

## JAMHURI YA MUUNGANO WA TANZANIA



## NEEMA YA AJIRA 44,000 SERIKALINI

**KUPATA TAARIFA ZA AJIRA MPYA, MATOKEO, INTERVIEWS, SCHOLARSHIPS,  
PAST PAPERS, MAGAZETI NA JOB TIPS HARAKA  
TEMBELEA [WWW.AJIRALEO.COM](http://WWW.AJIRALEO.COM)**

BUNGE limeelezwa kuwa katika mwaka wa fedha 2019/20, serikali itaajiri watumishi wapya 44,807 wa kada mbalimbali. Miogoni mwa kada zitakazoajiri watumishi wengi ni Elimu (13,526), Afya (9,467), Jeshi la Polisi (3,725).

Kada zingine ni Kilimo, Mifugo na Uvuvi (2,141), Magereza (685), Jeshi la Zimamoto na Uhamiaji (500), Hospitali za mashirika ya dini na hiari (1,262) na pia watumishi 13,002 wa kada nyingine wakiwamo wahadhiri wa vyuo vikuu vya umma.

Kauli hiyo ilitolewa bungeni jana na Waziri wa Nchi, Ofisi ya Rais (Menejimenti ya Utumishi wa Umma na Utawala Bora), George Mkuchika, alipokuwa akiwasilisha makadirio ya mapato na matumizi ya fedha kwa mwaka 2019/2020.

Alisema mbali na kuajiri, pia watumishi 290,625 watapandishwa vyeo kulingana na maelekezo yatakayotolewa.

### MISHAHARA

Aidha, alisema bodi itafanya utafiti wa hali ya mishahara na masilahi katika vyombo vya ulinzi na usalama ambavyo ni Polisi, Magereza, Uhamiaji, Zimamoto na Jeshi la Ulinzi la Wananchi wa Tanzania (JWTZ) ili kushauri namna bora ya kutoa motisha.

“Utoaji motisha utazingatia viwango stahiki vya kuongeza ufanisi katika kazi za vyombo hivyo,” alisema.

Mkuchika alisema Bodi ya Mshahara na Masilahi katika Utumishi wa Umma inatarajia kuandaa taarifa nne za gharama ya maisha ambazo zitatumika kushauri kiwango cha mshahara unaoendana na gharama za maisha kwa watumishi wa umma.

## **UHAKIKI WATUMISHI WA UMMA**

Waziri Mkuchika alisema serikali itafanya uhakiki wa watumishi kwenye sekretarieti za mikoa ili kuhakikisha kunakuwa na matumizi bora ya rasilimali watu katika utumishi wa umma.

Kadhalika, alisema wanachambua na kuhakiki madai ya malimbikizo ya mishahara ya watumishi wa umma 21,683 yenye thamani ya Sh. bilioni 50.7 na kuchukua hatua ipasavyo.

Sambamba na hilo, alisema watafanya uhakiki wa matamko ya rasilimali na madeni kwa viongozi wa umma 2,000 na kuendelea na mchakato wa kutumia mfumo wa ujazaji wa fomu za matamko ya rasilimali na madeni kwa viongozi wa umma kwa njia ya mtandao baada ya kukamilika kwa mfumo wa kielektroniki wa menejimenti ya taarifa za kimaadili.

Mkuchika alisema pia serikali itahusisha miundo na mgawanyo wa majukumu ya taasisi za umma 100 zikiwamo ofisi, wizara zinazotegemea, wakala za serikali na mashirika ya umma na kuziwasilisha kwa Rais kwa ajili ya kupata idhini ya utekelezaji na lengo likiwa ni kuongeza ufanisi.

Wizara hiyo ililiomba Bunge liipitishie Sh. bilioni 683.5, ambapo matumizi ya kawaida ni Sh. bilioni 483.6 na matumizi ya maendeleo ni Sh. bilioni 199.8.

Akizungumzia Mfuko wa Maendeleo ya Jamii (TASAF), Mkuchika alisema kwa mwaka wa fedha 2019/20 itafanya utambuzi na uandikishaji wa kaya maskini katika maeneo ya vijiji 4,408, mitaa 1,189 na Shehia 96 ambazo hazikufikiwa katika awamu ya kwanza ya mpango, huku kaya 355,000 zinatarajia kufikiwa.

Aidha, Mkuchika alisema Mpango wa Kurasimisha Rasilimali na Biashara za Wanyonge Tanzania (MKURABITA), inatarajia kuanzisha vituo vitano vya urasimishaji biashara ili kuwawezesha wafanyabiashara kupata huduma muhimu sehemu moja katika halmashauri tano za Kahama, Tabora, Nyamagana, Songea na Babati.

## **MAONI YA KAMATI**

Akisoma taarifa ya Kamati ya Kudumu ya Bunge ya Utawala na Serikali za Mitaa, Venance Mwamoto, alisema kamati hiyo inashauri serikali kuongeza mshahara kwa watumishi wa umma ili kuwawezesha kumudu gharama za maisha ambazo zimekuwa zikiongezeka kila uchao.

“Sisi sote ni mashahidi kwamba serikali haijaongeza mshahara kwa watumishi wa umma kwa mwaka wa tatu sasa,” alisema.

**SOURCE:** ippmedia.com

**KUPATA TAARIFA ZA AJIRA MPYA, MATOKEO, INTERVIEWS, SCHOLARSHIPS,  
PAST PAPERS, MAGAZETI NA JOB TIPS HARAKA  
TEMBELEA [WWW.AJIRALEO.COM](http://WWW.AJIRALEO.COM)**